


Go Cultura y Parokia di Santa Cruz ta bisa danki!

Limpieza den e teatro y parke di Ser'i Noka



ORANJESTAD (AAN): Diasabra ultimo a tuma lugar un gran limpieza den e teatro y parke di Ser'i Noka.

Tabata un mainta impresionante caminda e gran mayoria di esnan presente tabata muchanan y hobennan cu a trece nan famia pa asina nan asisti durante e hazaña aki.

Esnan presente no solamente a pone man na obra y a haci un gran esfuerzo pa laga e area aki limpi, pero nan tur a disfruta inmensamente haciendo esaki.

Tur hende a siña mas tambe di e historia di e teatro di Ser'i Noka y dicon e area ta asina special pa hopi di nos localnan.

Tabata un lastima si pa mira cuanto sushi nos propio ciudadanonan a laga atras den e parke unico aki cu ta un herencia natural valioso cu mester wordo proteha y traspasa pa nos futuro generacionnan.

Un momento historico y inolvidabel tabata ora cu a planta un mata di Tuturutu (poinciana) pa simbolisa e comienso di un era nobo pa Ser'i Noka.


Esaki ta e promé di e variacion grandi di mata local cu lo wordo planta den Ser'i Noka. Cu presencia y participacion di un di e visionario y pioneronan tras di e creacion y construcion di Ser'i Noka na aña 1963, Sr. Domi Tromp hunto cu su esposa Sra. Yvonne Tromp-Frans cu tambe tabata masha importante den realisacion y promocion di e anfiteatro, esnan presente por a



experencia un momento hopi emocionante cu plantacion di e mata aki. Sr. Domi Tromp a expresa cu orguyo: "Porfin! Porfin Ser'i Noka ta bay haya bida bek! Danki pa boso trabao duro!"

Sra. Yvonne Tromp cu un

sonrisa grandi riba su cara tabata conta di su tremendo recuerdonan di Ser'i Noka. Especialmente di e obra "Maria di Ser'i Noka". Hunto cu tur presente y tambe famia di Sr. y Sra. Tromp, a clausura un dia



special y hopi memorabel.

Fundacion Go Cultura y Parokia di Santa Cruz, encabeza pa Pastoor Jairo Maduro ta gradici tur cu a yuda inmensamente.

Aruba por ta sigur y orguyoso di e meta pa cu Ser'i Noka: No solamente rescata, restaura y renoba

e anfiteatro den aire liber, pero tambe proteha e flora y fauna den henter e area y hasta aña di mas vegetacion pa eleva esaki aun mas.

Esaki tabata djis e comienso di e rescate di locual cu tin, djey sigui pa restauracion y renobacion.

Dentro di poco Aruba lo conoce y disfruta di un anfiteatro sumamente bunita cu un y tur por tin acceso na dje pa proyectonan positivo.